

Bosna i Hercegovina
Federacija Bosne i Hercegovine
Federalno ministarstvo energije, rudarstva i industrije
Mostar

INFORMACIJA
o aktuelnoj situaciji na realizaciji EPC Ugovora za izgradnju Bloka 7 – 450 MW u
TE Tuzla

Mostar, juni/2021

INFORMACIJA

o aktuelnoj situaciji na realizaciji EPC Ugovora za izgradnju Bloka 7 – 450 MW u TE Tuzla

Uvod

Informacijom o aktuelnoj situaciji na realizaciji Ugovora o inženjeringu, nabavci i izgradnji Bloka 7 — 450 MW u TE Tuzla (EPC) za izgradnju Bloka 7 – 450 MW u TE Tuzla broj: 01-07-4042/2021 od 03.02.2021. godine (POSLOVNA TAJNA), koja je dostavljena ovom Ministarstvu 10.02.2021. godine uz akt broj 01- 07-4837/2021, ovo Ministarstvo je upoznato sa aktuelnom problematikom realizacije EPC Ugovora za izgradnju Bloka 7 - 450 MW u TE Tuzla, nakon izlaska General Electrica (podizvođača ključne opreme - kotao, turbina i generator) iz Projekta izgradnje Bloka 7 - 450 MW u Tuzli i ponude EPC Izvođača od 29.01.2021. godine alternativnih ponuđača za kotao (Shanghai Boiler Works Co., Ltd. sa tehničkom podrškom General Electrica), te za turbinu i generator Shangai Electric Group sa tehnologijom i licencom Siemens.

Isporuka kotla i turbo generatora od strane General Electric je bitan element EPC Ugovora, te je, između ostalog zahvaljujući izboru ALSTOM-a (pravni sljednik General Electric) za proizvođača te opreme, EPC Ugovor je i dobio saglasnost Vlade Federacije BiH, Parlamenta Federacije BiH i Skupštine JP Elektroprivrede BiH d.d. - Sarajevo. Stoga je JP Elektroprivreda BiH d.d. Sarajevo navedenim dopisom od 10.02.2021. godine tražila hitno održavanje sastanka sa predstavnicima Vlade s ciljem zajedničkog iznalaženja rješenja nastale situacije.

Nadzorni odbor Društva je na 52. sjednici održanoj 29.04.2021. godine donio zaključak broj 7/52, da se ostaje pri EPC ugovoru od 27.08.2014. godine sa pripadajućim aneksima 1. do 13. i u njemu imenovanim podizvođačima za kotao (GE Steam Power Switzerland GmbH/ GE Boiler Deutschland GmbH), turbinu i generator (GE Steam Power Switzerland GmbH/ GE Power AG) i kojim je zadužio Upravu Društva da preduzme mjere i aktivnosti na zaštiti interesa JP Elektroprivreda BiH d.d. - Sarajevo. O navedenom zaključku Nadzorni odbor je informisao nadležno ministarstvo i Vladu Federacije BiH aktom broj 01-07-14653/2021 od 07.05.2021. godine (dostavljen u prilogu).

JP Elektroprivreda BiH d.d. - Sarajevo je, aktom broj 07-14675/2021 od 07.05.2021. godine, obavijestila EPC Izvođača (Konzorcij CGGC-GEDI) o neprihvatljivosti njihovog prijedloga alternativnih podizvođača od 29.01.2021. godine i da ostaje pri EPC Ugovoru.

U međuvremenu, EPC Izvođač se obraća dopisima od 17.05., 18.05. i 26.05.2021. godine (od kojih je dopis od 18.05.2021. godine, između ostalih naslovljen i na Premijera Federacije BiH), u kojim navodi da alternativni podizvođači ispunjavaju sve zahtjeve iz EPC Ugovora i insistiraju na prihvatu njihove ponude do 31.05.2021. godine do kada je raspoloživ tim General Electrica u Stuttgartu, nakon čega njihovo alternativno rješenje od 29.01.2021. godine više neće biti dostupno.

JP Elektroprivreda BiH d.d. - Sarajevo je, u cilju blagovremene zaštite svojih interesa, angažovala i pravnog savjetnika (Advokatsko društvo Marić & Co. Sarajevo), koji je 21.05.2021. godine dostavio mišljenje o pravnoj situaciji koja je nastupila prijemom dopisa EPC Izvođača od 18.05.2021. godine, te o pravcima u kojima se ona može dalje razvijati. Prema pravnom savjetniku suštinski je bitno da se što prije zauzme stav i donese konačna odluka o tome da li će se EPC Ugovor pokušati ostvariti sa alternativno predloženim ili nekim drugim isporučiocem ili će se u suštini odustati od projekta, polazeći od toga da ga je nemoguće okončati bez opreme General Electrica. Solucija je da Elektroprivreda raskine EPC Ugovor zbog

nemogućnosti da se on ispuni na način kako je to ugovoreno, odnosno sa General Electric kao isporučiocem kotla i turbogeneratorsa ili da obavijesti EPC Izvođača da smatra da je Ugovor prestao po sili zakona zbog nemogućnosti ispunjenja. Prema pravnom savjetniku konačna odluka se mora saopštiti EPC Izvođaču što prije, pogotovo kada se ima u vidu koliko je vremena prošlo od njihove ponude (29.01.2021. godine).

Nadzorni odbor Društva je na 57. sjednici održanoj 28.05.2021. godine, prihvatio Informaciju Uprave Društva, sa prilogom pravnog mišljenja, povodom dopisa EPC Izvođača od 17. i 18.05.2021. godine i odgovor EPC Izvođaču u kojem se, između ostalog, navodi da JP Elektroprivreda BiH:

- ostaje pri Ugovoru o inženjeringu, nabavci i izgradnji Bloka 7 - 450 MW u TE Tuzla - EPC Ugovorom, broj 01-07-27673/2014 od 27.08.2014. godine sa pripadajućim aneksima 1. do 13. i u njemu imenovanim podizvođačima za kotao (GE Steam Power Switzerland GmbH („GESPS“)/ GE Boiler Deutschland GmbH („GEBD“), turbinu i generator (GE Steam Power Switzerland GmbH („GESPS“)/ GE Power AG („GEP“)
- da je realizovala sve svoje obaveze propisane EPC Ugovorom, unatoč pandemiji COVID-19 i da to očekuje i od EPC Izvođača
- upućuje novo upozorenje o kašnjenju uz taksativno podsjećanje na ranije izdata upozorenja i
- upozorava EPC Izvođača da će, u cilju zaštite svojih interesa, preduzeti sve mjere predviđene EPC Ugovorom i Mjerodavnim zakonom.

Sastavni dio ove informacije je akt, broj: 01-07-17106/2021 od 28.05.2021. godine, Informacija o aktuelnoj situaciji na realizaciji EPC Ugovora za izgradnju Bloka 7 – 450 MW u Te Tuzla i akt broj: 01-07-14653/2021 od 07.05.2021. godine, EPC Ugovor za izgradnju Bloka 7 – 450 MW u TE Tuzla – obavjest o zaključku Nadzornog odbora JP Elektroprivreda BiH d.d. Sarajevo.

Obzirom na neprihvatljivost ponuđenih alternativnih podizvođača i očitu nemogućnost realizacije EPC Ugovora sa ugovorenim podizvođačem (General Electric) JP Elektroprivreda BiH d.d. - Sarajevo će, u cilju zaštite svojih interesa preduzeti krajnju mjeru zaštite - raskid EPC Ugovora. Kako su Vlada Federacije BiH i Parlament Federacije BiH, dali saglasnost na EPC Ugovor, te izdali, odnosno odobrili Federalnu garanciju za realizaciju istog.

Federalno ministarstvo energije, rudarstva i industrije je predložilo ovu Informaciju da se sa istom upoznaju Vlada Federacije BiH i Parlament Federacije BiH te shodno tome predlaže sljedeći zaključak:

ZAKLJUČAK

1. Vlada Federacije Bosne i Hercegovine usvaja Informaciju Federalnog ministarstva energije, rudarstva i industrije o aktuelnoj situaciji na realizaciji EPC Ugovora za izgradnju Bloka 7 – 450 MW u TE Tuzla.
2. Informacija iz tačke 1. ovog Zaključka dostavit će se Parlamentu federacije BiH radi informisanja i eventualnog davanja određenih uputa vezano za nastalu situaciju u realizaciji EPC Ugovora.
3. Vlada Federacije Bosne i Hercegovine zadužuje JP Elektroprivreda BiH d.d. Sarajevo da poduzme sve mjere i aktivnosti na zaštiti, interesa JP Elektroprivreda BiH d.d. - Sarajevo u Ugovoru o inženjeringu, nabavci i izgradnji Bloka 7-450 MW u TE Tuzla – EPC ugovorom, broj 01-07-27673/2014 od 27.08.2014. godine sa pripadajućim aneksima 1. do 13.
4. Vlada Federacije BiH zadužuje Federalno ministarstvo energije, rudarstva i industrije da prati i istu na vrijeme informiše o svim provedenim aktivnostima.